



Pelajar Dua Fakulti Bergabung Pentas Teater Rakyat



Antara aksi semasa pementasan *Tun Kudu* di Dewan Banquet UPM.

SERDANG, 3 April – Pelajar Fakulti Bahasa Moden dan Komunikasi (FBMK) dan Fakulti Pengajian Pendidikan (FPP) Universiti Putra Malaysia (UPM) bergabung mementaskan teater rakyat berjudul 'Tun Kudu' sempena Malam Tradisi Sastera Rakyat ke-24 di Dewan Banquet UPM baru-baru ini.

Program tahunan itu dianjurkan oleh pelajar tahun dua Bachelar Sastera (Kesusasteraan Melayu), dan pelajar tahun tiga Bachelor Pendidikan (Pengajaran Bahasa Malaysia sebagai Bahasa Pertama), di bawah kursus Kesusasteraan Rakyat Melayu.

Pengarah program tersebut, Nor Muhamad Mat Zain berkata pementasan teater tersebut memberi peluang kepada pelajar mempelajari dan menghayati sastera rakyat Melayu sebagai salah satu bentuk seni budaya Malaysia.

"Melalui kursus ini kami dapat mempelajari seni pementasan supaya menjadi aktiviti pembelajaran yang menyeronokkan," katanya.

Beliau berkata pelajar yang terlibat telah memulakan latihan sejak semester lepas supaya pementasan dapat berjalan lancar dan tidak menghadapi sebarang masalah.

Seramai 400 orang pelajar telah hadir menyaksikan pementasan teater termasuk pelajar dari Institusi Pengajian Tinggi (IPT) lain iaitu Universiti Teknologi Mara (UTM) seramai 14 orang pelajar, Universiti Kebangsaan Malaysia (UKM) seramai 16 orang, dan Universiti Kuala Lumpur (10 orang).

Selain itu terdapat penonton dari Dewan Bandaraya Kuala Lumpur (DBKL) dan Istana Budaya turut hadir.

Teater tersebut mengisahkan Tun Kudu, anak kepada Bendahara Seri Wak Raja, Bendahara Melaka pada zaman pemerintahan Sultan Muhamad Syah.

Persengketaan antara Tun Perak dan Bendahara Seri Nara Diraja Tun Ali menyebabkan Sultan Melaka meminta Tun Ali melepaskan jawatan dengan mengenakan syarat supaya Permaisuri Melaka, Tun Kudu diserahkan kepadanya.

Pementasan Tun Kudu mendapat tunjuk ajar daripada pensyarah FBMK, Halimah Hassan, sementara Zainatul Shuharda Rahman dan Mohd Faizal Zainal bertindak sebagai tenaga pengajar produksi Tun Kudu.



Tun Kudu (kiri) dalam satu babak pementasan teater tersebut.

Disediakan oleh Seksyen Media dan Publisiti, Bahagian Komunikasi Korporat, UPM.